

## **Eleccziun dal president e da la suprastanza da la Pro Engiadina Bassa**

Als 28 november 2010 ha lö l'eleccziun dal president e da la suprastanza da l'associaziun regiunala Pro Engiadina Bassa per la perioda da 4 ons (2011-2014).

Il dret da vuschar e d'esser eligibel ha mincha citadin svizzer cun domicil aint il intschesch regiunal da la Pro Engiadina Bassa, chi ha raggiunt il 18 avel on da naschentscha e chi nun es suot avuadia causa malatia o deblezza mentala.

La suprastanza as cumpuona dal/da la president/a regional/a e da quatter commembers/bras.

La suprastanza vain eletta mincha jada per üna dürada d'uffizi da quatter ons chi cumainza als prüms schner. La dürada d'uffizi es limitada per maximal trais periodas. Independent da la dürada d'uffizi fingià prestada illa suprastanza, po candidar ün supstant per l'uffizi dal presi-di regiunal per maximal trais periodas d'uffizi. (Art. 28/2)

L'organ superiur (il pövel) elegia il president regiunal e'ls ulteriurs quatter commembers da la suprastanza regiunala.

Sch'ün capo cumünal o ün grondcusglier vain elet illa suprastanza da l'associaziun, schi vain automaticamaing in lur plazza il vicecapo resp. il suppleant dal grondcussagl rapreschantant stabel da la radunanza regiunala. (Art. 19/8)

*Elet es quel/quella chi ha raggiunt la majorità absoluta. Quella vain raggiunta culla majorità da las vuschs valablas da las personas chi candideschan, partida tras il dubel dals sezs libers. La prosma cifra intera fuorma la majorità absoluta. Ragiundschan daplü personas la majorità absoluta co sezs chi sun d'occupar, schi sun quellas personas elettas chi han las plü bleras vuschs. Schi fa dabsögn d'ün seguond scrutin, vala pro quel la majorità relativa.*

L'eleccziun succeda tras ils cumüns. La PEB metta a disposiziun la documainta d'eleccziun. Al di d'eleccziun vain dat cuntshaint a la PEB ils resultats da mincha cumün. La PEB publichescha ils resultats da tuot ils cumüns.

La Pro Engiadina supplichescha als cumüns, als partits politics, ad organisaziuns ed a mincha citadin majoren da far propostas fin als 15 da settember 2010. Quellas sun da drizzar cun tuot las indicaziuns persunalas al secretariat da la PEB, Chasa du Parc, 7550 Scuol. La PEB prepara ün fögl cun tuot ils candidats, cun fotografia e las persunalias. La PEB surdà quel fögl culla documainta da vuschar als cumüns tenor indicaziun da votantas e votants. Ella nu fa ingüna propaganda electorala.

Scuol, als 12 lügl 2010